

Mungzsanh Yen Gawjbanh Bi 2017 Eufwen Doxdax

蒙山县举办 2017 年山歌擂台赛

11 nyied 2 hauh, Mungzsanh Yen youq yienhsingz Gujyungz Gunghyenz gawhbanh eufwen doxdax aeu “danq haenh Cibgouj Daih caez guh siengjmuengh Cungguk” guh cawjdaez haenx. Daengx yienh 30 boux canghfwen ak hopheux vutgungz gunggeng、gyauhdungh gensez、lajmbanj swnghdai、gingq laux gyaez caen、ndaw ranz doxhuz caeuq cingsaenz Cibgouj Daih Dangj daengj neiyungz ma ciengq eu、yinx ndaej baenz cien lai vunz lai daeuj ganj haw haenx humx dwk ngonzyawj. Ginggvaq doxdax le, bingzok it daengjciengj 1 boux、ngeih daengjciengj 2 boux、sam daengjciengj 3 boux、youhsiu ciengj 6 boux, doiq doengh boux ndaej ciengj haenx cungj fat hawj ngaenzciengj caeuq mbaw cwngsuh.

(Dai Lenzswng/戴连升)



▲ Eufwen doxdax yinx ndaej baenz cien lai vunz daeuj yawj.

► Angqhoh Cibgouj Daih, caez guh siengjmuengh Cungguk.



Lozcwngz: Beixnuengx Mulajucz Angq Gvaq Cietyihfan 罗城：万人空巷欢庆依饭节

11 nyied 6 daengz 7 hauh, Lozcwngz Mulajucz Swciyen gawjhengz gaiq daihsam Mulajucz cietyihfan vwnzva lijyouz nem banggungz canjyez cauhsangh hozdung, beixnuengx Mulajucz dangdieg ndang daenj buh moq vaq moq, caeuq gyoengq hek seiqlengq bet fueng caez angqhoh aen ciet hoengh neix.

Ciuq cam rox, cietyihfan dwg beixnuengx Mulajucz aen ciet cienzdoengj daegsaek he, dwg aen ciet cienzdoengj beixnuengx Mulajucz gamjaen hoizyienh、angqhoh fungsou、mbaenjgouz vunz demlai ndaej anonj, daengz seizneix gaenq ndaej 500 lai bi lizsij. Bi 2006 ndwen 5, Mulajucz cietyihfan gaenq ndaej lied haeuj buek daih’ it gaep guekgya feihvuzciz vwnzva yizcanj mingzloeg.
(Liu Gvanghfuz/廖光福)



▲ Gyoengq bouxyienj yienj fouxnajsaenz Mulajucz miz daegsaek haenx.

Sanhgyangh:

Beixnuengx Duncuz “Dohyeh” Ciengq Yiengj Saedcej Moq 三江：侗乡“多耶”唱响新生活

Sanhgyangh Duncuz Swciyen Bazgyangh Cin gawjhengz “dohyeh” Duncuz doxdax, 12 aen doihdaiqbiuj dai dangdieg daeuj haenx doengz daiz doxdax baijyienj, aeu gij godohyeh rwzsug ndeidingq、yungzheih dingq rox haenx lwnhgangj Cibgouj Daih cingsaenz, cienz ciengq vutgungz gunggeng、minzcuz doxgiet、minzswng h gajndeidei daengj veiminz cwngcwz, ciengq yiengj saedcej vuenyungz moq.



▲ Ciengq go diuq foux ciengq yiengj saedcej moq.

“Dohyeh” dwg hoiz yaem vah Duncuz, eiqsei de dwg “ciengq go couh yaek aeu diuq foux”, dwg cungj hingz sik go cienzdoengj Cungguk Duncuz ndawde cungj ndeu, hix dwg Duncuz fouxciidij hung he, doengh boux camgya haenx cungj dwg fwngz rag fwngz humx baenz aen luenz, gaen bouxlingxciengq vaiqmenh doq ciengq doq foux.

(Vuz Lenyinh/吴练勋
Cauz Couhdingz/曹舟婷)



▲ Nungzyez gisuz yinzyenz youq ndaw suenmak guh cazniemh.

Yungzanh:

Haeuj Suenmak Caeuyiengh Cazniemh Makgaemjgaet Bauj Habgek Ndaej Gai

融安：田间地头抽样检测 确保金桔合格上市

11 nyied 2 hauh, Liujcouh Si Yungzanh Yen 13 fanh moux makgaemjgaet yaek ndaej mbaet gai, aen yienh neix cujiz nungzyez gisuz yinzyenz haeuj daengz gak aen nungzcanz ndawranz ndaem makgaemjgaet、hozcozse makgaemjgaet haenx caeuyiengh cazniemh caeuq dinghsingq dinghliengh cazniemh, itdingh aeu baujcwnj makgaemjgaet Yungzanh habgek ndaej gai, sawj vunz lai ndaej cawx daengz gijgwn cuengqsim、gijgwn mbouj miz doeg.

Ciuq cam rox, Yungzanh Yen itcig miz aen mingzdaez ndei “aen mbanj makgaemjgaet Cungguk”, dwg 《Makgaemjgaet》guekgya biucinj dinghguh danhvei caeuq daengx guek makgaemjgaet cujyau diegndaem ndawde aen ndeu. 2017 nienz, Yungzanh ndaem makgaemjgaet menciz dabdaengz 13.3 fanh moux, canjlieng gujsuenq 13.3 fanh dun, canjeiz 5.8 ik maenz.

(Cinz Ginghoz/覃庆和)